

Շատվան

Բնակչության թիվը՝ 445

Շատվանը գտնվում է Սևանա լճի հարավային ափից դեպի արևելք՝ 17 կմ հեռավորության, ծովի մակերևույթից՝ 2004 մ բարձրության վրա: Այստեղ ապրում են Ադրբեջանի տարբեր շրջաններից բռնագաղթված 200 և Հայաստանի տարբեր շրջաններից վերաբնակված 57 ընտանիքներ: Շատվանի մասին տեղեկությունները մասնագետները կապում են Խեթական աղբյուրներում հիշատակված հին Հայկական Սուրբա կամ Շուրբա քաղաքի հետ, որը նույնացնում են Ձողի հետ: Ուշ ժամանակներում Ձողը մտնում էր Մեծ Հայքի Սյունիք աշխարհի Սողք գավառի մեջ և իշխանանիստ էր: Ներկայիս Շատվանը սկզբնական շրջանում եղել է Սյունաց իշխանների յայլադատեղին և կոչվել է Շուրասար: Հետագայում նույն տեղում հիմնվել է գյուղ Շուրասար անվանումով, որտեղ ապրել են իշխանաց տան հոտադներն ու նախարապանները: 12-րդ դարում տարածքը ենթարկվում է թուրք սելջուկների հարձակմանը: Հուսեյին Կուլի խանը կոտորում է հայ ազգաբնակչությանը և գյուղը դարձնում իր նստավայրը՝ անվանելով այն <<Հուսեյին կուլու աղալու>>: Այդ անվանումը պահպանվել է գյուղի վրա մինչև 1929թ, որից հետո այն վերանվանվել է Նարիմանլու՝ բոլշևիկ հեղափոխական Նարիման Նարիմանովի պատվին: 1988թ. դեկտեմբերի 3-ին Ադրբեջանից բռնի տեղահանված 90 ընտանիքներ Շամխորի շրջանի Նուզգեր գյուղից, տեղափոխվեցին Նարիմանլու գյուղ, որից հետո Կիրովաբադից, Բաքվից Խանլարի շրջանի Միրզիկ գյուղից և այլ շրջաններից նրանց շարքերը համալրեցին փախստական նոր ընտանիքներ: 1990թ. գյուղը վերանվանվեց Շատվան: Այստեղ գործում է դպրոց, բուժկետ: Բնակչությունը հիմնականում զբաղված է գյուղատնտեսությամբ: